

1617

10^e Car. 12

L E T T R E

D E

MONSIEVR LE DVC
DE MAYENNE,

A V R O Y.

*Avec la Responce à icelle par sa
Majesté.*



A PARIS.

Chez FED. MOREL, & P. METTAYER,
Imprimeurs ordinaires du Roy.

M. D C. XVII.

Avec privilege de sa Majesté.

310-45-301

1001

E R T T A A

Case 1001

THEY FLY

39

326

1617Ly2

THEY FLY

1001



LETTRE DE MONSIEVR
le Duc de Mayenne au Roy.

S I R E,
I'enuoye monsieur le Baron de Linieres à vostre Majesté, pour la supplier tres-humblement de vouloir ouïr mes iustes calamitez, esperant qu'elle me fera l'honneur de les recevoir fauorablement, & que sa bonté sera touchée du iuste ressentiment que i'ay des violentes entreprises faictes sur ma vie, & les places de mon Gouvernement, données à feu mon pere, non pour satisfaction ny recompense, mais pour marque & gage honorable de sa fidelité & conduite, estimée par tous les bons François dans les guerres ciuiles, ayant conserué vostre Estat en son entier contre les desseins estrangers, sans en souffrir aucun desmembrement.

I'espere d'auantage, Sire, que vostre Ma-

jesté par sa bonté & prudence, nécessaire
 en telle occasion, fera faire chastiment ex-
 emplaire de celuy ou ceux qui ont mes-
 chamment, à prix d'argent, tramé & con-
 duit ce mauuais dessein, mesmes de celuy
 qui vouloit en estre l'executeur. Ce procé-
 der, Sire, de rauir la vie de vos suiets, & de
 ceux qui ont l'honneur de tenir des pre-
 miers rangs & principales charges de vo-
 stre Royaume, qui ne tesmoignent par
 leurs paroles, actions & deportemens, que
 toute obeyssance, qui ne respirent que vo-
 stre seruice particulier, & le bien de vostre
 Estat, qui volontairement pour ceder au
 temps & aux conseils violens, se sont vou-
 lus bannir de la France, acceptans les pro-
 positiōs qui leur ont esté faictes des voya-
 ges aux pays estrangers, qui pour le res-
 pect qu'ils portent à vos commandemens,
 ont oublié toutes iniures & calomnies
 qu'ils ont receu de vos Ministres; bref, qui
 ne cherchent que du repos en leur vie dās
 l'innocence de leurs actions, ne se peut
 nommer autrement qu'une persecution
 insupportable & inouye dans vostre Roy-
 aume, qui passe plus auant que la vengean-
 ce que l'on peut rechercher contre les
 particuliers. A quoy ie supplie tres-hum-

blement vostre Majesté d'auoir quelque
 esgard, puis que c'est le deuoir de ceux qui
 sont interessez en la conseruation de vo-
 stre personne , & de vostre Estat, de vous
 en donner aduis ; & ma plainte estant ap-
 puyée des loix diuines & humaines, m'a
 faict esperer que vostre Majesté la receura
 avecques la mesme bonté qu'elle a accou-
 stumé de tesmoigner à tous ses subjects en
 leurs iustes requestes. Et qu'elle me fera
 l'honneur de croire qu'aucunes sortes de
 persecutions ne me pourront iamais faire
 changer la resolution que i'ay prise de tes-
 moigner par toutes mes actions le tres-
 humble seruice que ie dois à vostre Maje-
 sté. A quoy ie n'espargneray mon sang &
 ma vie, croyant aussi que vostre Majesté
 aura plus agreable de la voir finir de ceste
 sorte , que par de si mauuais moyens.
 Estant Sire, de vostre Majesté tres-hum-
 ble, tres-obeyssât & tres-fidelle seruiteur,
 & subiet,

M A Y E N N E.

De Soissons ce II. Ianuier 1617.





